



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ,  
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS,  
*manè discutienda in Scholis Medicorum, die Jovis vigesima-nonâ  
mensis Decembris, Anno Domini M, DCC. LXIII.*

M. EXUPERIO-JOSEPHO BERTIN, Supremi  
Valachiæ & Moldaviæ Principis, necnon Regis castrorum &  
exercituum Medico Primario, è Regiâ Scientiarum Academiâ  
Parisiensi, Doctore Medico, Præside.

*Utrum in Pleuritide sanguis mittendus è brachio lateris affecti?*

I.



I non unicum, saltèm præstantissimum est inflammationis  
remedium venæ sectio. Hanc igitur sibi vindicat vera genuina-  
que Pleuritis. Quotquot sunt melioris notæ Arabes, Græci,  
Latini, & cujuslibet Gentis & ævi Medici, præcipuum  
illius curationis cardinem in sanguinis missione collocant,  
non neglectis tamen plurimis aliis auxiliis quorum enu-eratio  
in præsentî foret intempestiva, At verò quoniam in brachio vena tundenda,

A

sit, an in brachio dolentis vel sani lateris, non idem est eorum consensus. E directo Græci cum *HIPPOCRATE*, *Galeno*, *Celfo*, horumque doctrinæ cultoribus, ex opposito Arabes cum *Aræto*, *Aëtio*, *Calio*, *Aureliano*, sanguinem detrahendum volunt. Recentior hæc opinio Græcorum præceptis diu prævaluit. Revera quidem ab octavo sæculo usque ad decimum sextum, idèque per octingentos annos, omnes terè Medici in Pleuritide venam secutæ in brachio lateri dolenti opposito. Sed ineunte sæculo decimo sexto, detectâ jam arte Typographicâ, *HIPPOCRATIS* & *Galeni* opera primum Typis mandata, dein publicè lecta & commentariis à perillustribus Medicis, potissimum Parisiensibus, aucta fuere, tuncque venæ sectio in affecto latere fautores pariter obtinuit. Utrunque brevi incaluerunt animi, acerrimèque sunt præliati. Mirari licet quot & quanti viri in disputantium gregem abierint. Ex iis sæculi decimi sexti Medicis qui hancce difficultatem agitarint, primus omnium extitit *Petrus Brissotus* quem Schola Parisiensis habuit Doctorem eximium. Explosis Arabum libris, quædam *Galeni* volumina publicè legit & interpretaus est; & cum Græcorum placita de instituendâ in brachio lateris affecti venæ sectione Doctori nostro plurimum arriserint, contra vulgatiorem opinionem rectum animum tenere, & à recepto dudum more recedere primus ausus fuit. Is itaque Arabum desertor ad castra Græcorum se recepit & cum illis mittendum esse in Pleuritide sanguinem è brachio lateris affecti ratione & experientiâ comprobavit. (a)

ARABO. 1514.

(a) Vid. lib. de nûssione sanguinis in pleuritide Auctore Renato Moreau, D. M. P.

Vid. etiam disceptationem apologeticam Petri Brissoti ad Dionysium Medicum de sanguinis detractatione.

Non abs re circa has lites movenda quæstio videtur; cum plurimi sint melioris notæ Medici qui neutram partem sibi eligentes, in alterutro latere Phlebotomiam indiscriminatim celebrent. Post enim inventum sanguinis circuitum novâ quasi caligine medentium oculos perstrinxit error, ita ut quonam ex brachio sanguis mittendus esset, dummodo sufficienti copiâ mitteretur, parvi vel nihili referre, consensu satis unanimi, opinati sint; dum alii in Arabum hæresi perseverantes, ex opposito parti dolenti sanguinem educunt. In hæc opinionum diversitate potiorum suadebimus venæ sectionem quâ citius tutiusque Pleuritis solvetur.

## III.

**N**ON solum de secundæ venæ delectu, sed etiam de Pleuritidis sedē inter auctores disceptatur. Quoties autem cum pulsu duro aderit febris acuta continua inflammatoria, Dyspnœa, tussis molesta, dolor lateris punctorius in inspiratu augescens, veram genuinamque fidenter affirmaveris Pleuritidem, quæ humida si una cum his symptomatibus sputa prodeant, sicca verò dicitur eaque pejoris est ominis, quando non prodeunt sputa. Opus est autem, inquit *Arætaus*, omnia hæc inter se consonare atque conspirare ab una causâ pendentia. Quotquot enim ex his alia ab aliâ causâ proveniunt, etsi omnia simul congruunt, Pleuritis non vocatur (a). His positis exquisitâ correptum Pleuritide intueamur. Jacet jam affixus lecto qui pridie firmis lateribus & athletico habitu durissimos labores exantlabat. Scintillant oculi, rubescunt genæ, sitis adurit, lingua exarescit, nec dat nisi tremula & interfecta verba. Interno externoque totus depascitur igne; urentem veluti ex fornacis camino exprærat halitum; à frequen-

(a) De causâ & signis morborum acutorum, lib. 1. cap. X.

tissimâ & ineluctabili tussiendo necessitate ingeminant cruciatus. Lateri dolenti accumbit miser premitque lectum doloris, ut pondere corporis veluti fasciâ circumligatum latus, minus atrociter doleat. Si inspiret, torquetur, si non inspiret, suffocatur. Inter utrumque anxius, liberali aeris usurâ aut lubens sibi interdicit, aut invitus, renovato ad plenioris inspirationis nixum dolore convellitur. Ex iis tamen Pleuritidis legitimæ phœnomenis, ipsius sedes non designatur. Hanc *Cœlius Aurelianus* (b), & plures antiqui Medici post HIPPOCRATEM, tùm in pleurâ, tùm in pulmone reposuerunt. Fatendum quidem est, cum pleura pulmonem obvesiat, sæpissimè adjunctam esse Pleuritidi Peripneumoniam. Cum verò dolor lateris sit individuus Pleuritidis comes; cum sæpissimè inflammetur hæc pleuræ appendix quæ pulmonum tunica est, etiam absente lateris dolore; cumque nunquam latus doleat, vigente licet febre acutâ, nisi portio pleuræ costas succingens aut musculi intercostales aut ambo simul inflammatione laborent, Pleuritidis sedem in membranâ costas succingente & in musculis intercostalibus cum *Galeno* collocamus. Variis tamen tincta coloribus sputa, quorum in Pleuritide tanti momenti est effluxus, ad eam quadantem videntur adducere opinionem quâ pulmones non minùs quam pleuram Pleuritidis sedem esse contendunt. Talis verò est inter pleuram, musculos intercostales ipsumque pulmonem, per nervos & vasa consensus, ut obstructis vel inflammatione correptis pleuræ aut musculorum intercostalium vasis & nervis, nihilominus facile concipi possit quomodo ad pulmonem fiat affluxus humoris istius, qui in Pleuritide sputa constituit. Numquid enim arteriæ propriæ pulmonum, bronchiales scilicet, arteriarum intercostalium soboles sunt (c)? Numquid vel ad minimam nervorum intercostalium titillationem convelluntur fibræ musculares pulmonum, sicuti vel ad levissimam in nervis tracheæ arteriæ inpressionem convelluntur musculi respirationis? Numquid tandem liquores injecti ab amplissimo Archiatrorum summi Pontificis olim Præsule *Lancisio* in truncum venarum intercostalium inferiorum, id est in venam *azygos*, redeunt per tracheam arteriam? Ut ut sit, siye in membranâ costas succingente, siye in musculis intercostalibus, siye in utrisque simul niduletur Pleuritis, primum in sanguinis missione quaerendum est remedium. Constat enim dolorem intolerabilem in ipsomet instanti quo sanguis de corpore manat, aut sæpè destrui aut magnoperè sublevari. Quonam alio potissimum in dio haud cunctanter febris urens extingueretur; difficilis, anhelosa, tussiculosa respiratio expeditior fieret; molesta & dolorifica tussis comperceretur; pungens sedaretur dolor? Quonam alio potissimum medio sputa uberius faciliusque provocarentur; cruditas humoris in ultimis vasorum diverticulis cespitantis aut extra vasa inter musculorum intercostalium ta' ulata vel inter hocce musculos & pleuram effusi, ad felicem coctionem resolutionemque perduceretur? Nonne imminutâ sanguinis molis pacatur solidiorum Erethismus, laxatur vatorum constrictio, panduntur venarum re-sorbentium officia, infringitur humorum deviantium impetus? At *occasione præceps*. Seligenda igitur est sanguinis missio quæ à latere sano mali labem avertat, humorisque lateris affecti vasa infarcientis coctionis resolutionique faveat. Cum enim Pleuritis sit periculosissimus morbus, nec cunctatoris moras ullo modo patiat, sed in novissima mala prioribus pejora bre-

(b) Aut. morbo. lib. 11. cap. 36.

(c) Dicitur etiam à truncu aortæ descend.

vissimè degener abeat, si segnioribus armis debellètur; omnibus idcirco sanguinis evacuationibus hæc erit anteponenda quæ naturæ laboranti tutius citiusque opitulabitur.

### III.

(f. a.) Sect. VI.  
ap. lili.

**P**AUCISSIMAS agnoscit legitima Pleuritidis causas quas non habeat cum inflammatione communes. Ipsamet sanguinis inflammatoria *Diarthesis* inter primarias recensenda est. Ex quo Sydenhamus, *Pleuritidem nihil aliud esse quam febrem à propria & peculiari sanguinis inflammatione ortam, quæ natura materiem peccantem in pleuram deponit, nonnumquam & in pulmones, unde Peripneumonia suboritur, quam à priori gradu tantum & pro majori ejusdem causæ intentione, extenuatque latiori differe autumat* (a). Præterea vitata partium thoracem constituentium compages, vasa præter naturam angustiora, ac frigidus Austrinus subito succedens & calenti corpori circumfusum, potus gelidus subito ingestus, musculorum respiratori inservientium perpetua officia, nixus quos exigunt diversæ vitæ munia, articularum à thoracis externis, à mammariis internis, ab intercostalibus superioribus & inferioribus, à diaphragmaticis numerus ingens, pressio pulmonum tempore expirationis in venam azygos quæ venarum intercostalium truncus est, metastases, &c sunt totidem causæ quibus ad thoracem speciatim determinatur inflammatoria sanguinis spissitudo. At iidem omnino sunt Pleuritidis ac inflammationis exitus. Omnium porro maximè optabilis erit ille qui *resolutio* Medicis vocatur aut saltem congesti humoris concoctio. Alterutram aut utramque simul ne quis se credat assecuturum, nisi sanguinem congestum meabilicrem & minus acrem reddat, obstructaque vasa reseret.

Qui Arabum vestigia premunt, censent, idè in distanti loco venam esse incidendam, ut sanguis à morbi sede revellatur. At quid indè non redundat nocivi? Nonne materies morbifica à priori sede partim dimota, ad aliam derivatur? Quid igitur eveniet, si in pulmonum substantiam mali labes exoneretur? Quid, si in latus sanum, ut frequentius debet contingere? Nonne duplici sic efformatâ Pleuritide de ægrotante penè conclamatum est? Cum enim intempestivâ derivatione in lateris sani musculos novæ defluant inflammati sanguinis undæ, jam non absolvitur respiratio ad vitam necessaria & omnia in pejus ruunt.

Qui medium Græcos inter & Arabes tenent, nec ad revellendum nec ad derivandum, sed ad imminuendam exuberantem sanguinis molem allaborant. Nec minus culpanda est eorum indifferentia. Medicus enim, ut jam diximus, eam debet seligere evacuationis speciem quæ certiora, citioraque præbet auxilia. Pluribus viis itur ad sanitatem; brevissima verò unica est & huic præsertim insistendum. Porro indicationi adversatur qui ex opposito sanguinem mittit. Nonne in idem Arabum incurrit vitium quo mali labes dolenti hærens lateri, in sanum latus vel refunditur vel potest refundi? Metuendum profecto est, ne dum titubantia sub mole movendorum inflammata vasa, quaquaversis ubi minor est resistentia, exitialem sarcinam deponere gestiunt, uberior per venæ sectionem ex opposito in subclaviam arteriam sanam, in mammariam, in intercostalem superiorem, in thoracicas externas sani lateris, inflammati sanguinis affluxus

determinetur. Tunc enim æstuantis sanguinis molecularum quæ continuâ & ineffabili serie devehebantur ad affectum latus, abruptitur filum & ex in latus sanum tumultuatim ruunt; nec tamen ideo expeditur latus affectum. Quibusnam tunc prædidiis & lateri prius dolenti & lateri recens inflammato succuretur? Moribundus æger, duplici Pleuritide vexatus, solo potest diaphragmate respirare. Hinc deficientibus inspirationis & expirationis organis, sanguine obruuntur pulmones, venæ cavæ turgent, respuuntque à venâ *azygos* delatum sanguinem. Hinc sanguini ex venis intercostalibus & mammariis refluere totus aut pro majori parte præcluditur exitus. Nullus jam resolutioni, coctionique aditus patet. Anxietate summâ torquetur æger propter sanguinem in utrâque venâ cavâ, in auriculâ dextrâ & in dextro cordis atrio collectum. Pulsus fit frequentissimus, vacillans, debilis ab impedito sanguinis transfluxu ex arteriarum pulmonalium ramis in pulmonalium venarum ramos, & subito lethalis subnascitur peripneumonia. Pessimè igitur ægrotantis salutem conuultur, si sanguis in Pleuritide ex opposito latere mittatur. Nonne ideo præstantior erit è directo sanguinis missio, quâ respirationis organis lateris sani prospicitur, resolutioni coctionique humoris tutius faveretur, citiusque ægrotantes ex morbo convalescant, ut ex praxi comprobatur.

## I. V.

**V**ASORUM sanguiferorum distributiones quarum ope venæ sectionis effectuum erga peculiare quasque partes enodatio tentaretur, ratio neque ab hydraulicis legibus petitas, quibus sententia nostra de directâ sanguinis missione stabiliretur enarrare longius foret. Nuppiam inflammatio videtur adesse nisi in arteriis quibuscumlibet. Nec mirum si venas plerumque expertes & liberas agnoscamus. Ex angustâ ad latam diametrum jugiter progrediente sanguine, inflammatoriam congestionem in venis vix unquam posse fieri censemus; nisi loca ubi venæ minimæ in truncos venosos abeunt, majoribus obicibus eodem occupentur tempore quo inflammatione corripiuntur arteriæ. Cum autem ex extremis arteriarum capillamentis, sanguis in venarum cavo deponatur, nonne sequitur ut à propioris affectæ parti venæ sectione, sanguini congesto meabilitas, vasisque obstructis tonus amissus promptius reddatur? Et revera hæc evacuatione detrahuntur columnæ sanguinæ quæ sanguini in inflammatis arteriis congesto ponunt obices, quibus sublatis sanguis à tergo pulsus à vasorum vinculis & inflammatâ sede facilius recedit. Equidem per directam in Pleuritide venæ sectionem non evacuatür sanguis inter locum inflammatum & cor contentus, quod fatemur ultrò; sed 1º. evacuatur vena subclavia lateris affecti, ac proinde vena intercostalis superior, & venæ thoracicæ externæ ejusdem lateris sanguinem facilius exonerant in subclaviam quæ minus resistit. 2º. Non derivatur sanguis in latus sanum à cujus actione tunc temporis pender ægrotantis vita. Verùm in obscuris opportunè affulget fax experientiæ quæ semper est ratione potior. In gravi diuturnâque ophthalmiâ nonne felici cum successu temporibus palpebrarumque



viciniis admoventur hirudines? Nonne & tumidis hæmorrhoidibus applicantur, dum quidam abdominalium viscerum infarctus referendus venit (a)? Num etiam faustè jugularis vena tunditur ad solvendas pertinaces sanguinis in cerebro congestiones (b)? Sic pariter in pleuritide à directâ sanguinis missione resolutio promptior fiet. Nec in afferendis probationibus hærebimus incerti. Primam desumemus è vitâ (c) *Brissotii*; utpote primi Neotericorum directæ sanguinis missionis in Pleuritide præconis. *Periculosis* Pleuritidibus anno 1515 & 1516 circa tractum Parisiensem grassantibus, emissus exercendæ Medicinæ gratiâ in proxima suburbia juvenis quidam *BRISOTTI* familiaris & auditor, Pleuriticis omnibus venam è directo secuit tam læto successu ut omnes ad unum pristinæ sanitati restituerit, plurimis eorum aut morientibus aut longo tempore languentibus, quibus ex opposito brachio sanguiniseductio præscripta fuisset. Recentissimè suis observationibus eandem sententiam stabilivit *Trillerus* (d). *Pulcherrimè*, inquit *Doctissimus Van-Swieten*, hæc omnia notabili exemplo confirmantur (à *Trillero*), dum in binis juvenibus, idem viæ genus ducentibus, eodem temporis puncto, & ob easdem causas Pleuritide correptis, experimenti gratiâ vena aperiabatur. Ille cui vena in brachio lateris affecti aperta fuit, licet pessimè deliraret, brevè ad se rediit, nec iteratâ venæ sectione opus habuit. Alter cui & major copia sanguinis ex pede ejusdem lateriseducta fuerat, nullum inde levamen sensit, & sequenti die alterâ venæ sectione in brachio lateris affecti opus habuit, unde illicè mitigabantur omnia symptomata & postea felici crisi liberatus fuit à periculoso morbo sed biduo serius quam prior (e). Has autem observationes iterum atque iterum confirmatas fuisse compertum est. Sequentes propriâ manu collectas hic opportunè memoramus. Mulieri trigeneriæ, in octavo graviditatis mense, Pleuritide verâ correptæ octies missus fuerat sanguis, dolore tamen semper superflite. At hirudinum parti dolenti applicatione brevè siluit, prolemque suam debito tempore mulier peperit. Vir triginta trium annorum natus, legitimâ pariter laborans Pleuritide, sanguinis missionem decies passus erat. Febris quidem mitigabatur, sed eodem tenore miserum ægrôtantem excruciebat dolor punctorius, quem repetita hirudinum dolenti lateri admotio feliciter compefecit. Similem hirudinum applicationis effectum in pertinacibus Pleuriticis doloribus à se observatum esse pluries nobis narravit Clarissimus D. D. *du Bois*, Collegii Medicorum Rhedonensium Decanus & supremæ Curie Aremoricæ Medicus. Quin imò in ipsâmet Pleuritide, emplastrum epipasticum parti dolenti applicari vidit & ipse jussit illustrissimus Imperatricis Augustissimæ Archiatrorum Antistes (f). Nonne faustus exitus has secutus est operationes, quia talis evacuatio est directâ magis quam ab ipsomet brachio affecti lateris? Præterea sententiæ nostræ suffragatur recentissima Pleuritidem sanandi Neotericorum & antiquissimorum Medicorum methodus, quæ magnam adscribit curationis partem fomentis, inunctionibus, cataplasmatibus, laxantibus emplastis morbofo lateri applicandis, quibus omnibus ad affectum locum major videtur determinari fluidorum copia. Sedulâ igitur omnium inquisitione, abundè patet venam in brachio Pleuriticis lateris esse incidendam, quippe citius tutiusque quam ex opposito sanguinis missio, Pleuritidem curat.

(a) *Vid.* Egre-  
giam thesam M.  
J.B. Lud. *Chomel*,  
antiq. Facult. Me-  
dicæ. An tumidis  
hæmorrhoidibus  
hirudines? 1750.

(b) *Vid.* Nume-  
rosam thesam M.  
Hyacinth. Theod.  
Baron, antiq. Fo-  
cult. Medicæ. An  
solvendi pertina-  
cibus sanguinis in  
cerebro congestio-  
nibus jugularis  
venæ sectio? 1734.

(c) Auctore Re-  
nato Moreau,  
D. M. P.

(d) Comment.  
de Pleuritide.

(e) Conamant.  
in Aphor. Boerh.  
tom. III. §. 890.

(f) Gerardus  
*Van-Swieten*, in  
Comment. Aphor.  
tom. III.  
§. 890.

**E** Venâ capaciori, amplâ aperturâ, mittendum esse sanguinem & quidem non modicè, primis potissimum diebus, nostratum Medicorum unanimis ferè est acclamatio. Parciores sunt sanguinis in Pleuritide Græci, Arabes, Latini, Septentrionalesque Medici. Diverfitatem excitavere diversa victus régula, diversa temperies, inopia experimentorum apud Antiquos, ignorata sanguinis circulatio. Arduum certè nec satis tutum foret absolutam sanguinis educendi, fixis terminis, exprimere quantitatem, quæ pro diversâ symptomatum sævitie, pro ætate, regione, tempestate, temperamento, sexu, consuetudine, prægresso sex rerum non naturalium usu debet esse varia. In genere tamen ægotantium salutis citius tutiusque consulit, qui liberali & prudenti, quam qui parciori dosi sanguinem detrahendum jubet, ut ratione & quotidianâ experientiâ confirmatur. *Sydenhamus* in primo morbi insultu sanguinem ad uncias x in adultis mitti præcipiebat. Nec hærebatur in hac primâ evacuatione. Observat enim veram Pleuritidem in adultis rarò minore quam xl unciarum sanguinis impensâ sanari (a). Quin imò, si symptomata pertinaciter sæviant, si augeatur eorundem sævities, si sopita violentius recrudescant, largiore & quidem largissimâ manu fundendum esse sanguinem nos docet clinica observatio. At profectò errant qui mittendum esse sanguinem opinantur, donec coriacea crusta rubræ sanguinis placentæ super-expansa evanuerit. Præter-quàm quod enim crusta hæc polyposa in sanorum sanguine quandoque apparet, totus ad ultimas usque uncias latice purpureo exhauriretur æger, nec tamen nudum cruorem crusta linqueret. Hoc suadet intuitus sanguinis qui post sæpè repetitas venæ sectiones crustâ illâ densiori, crassiorique nonnumquam obducitur. Nec magis credendum præcepto quod venæ sectionem post quartum, quintum, sextumve diem nobis interdiceret. Sapiētiōr nobis videtur regula quæ sanguinis missionem instituendam præscribit, quocumque tempore symptomata sæviant & vires acquirant eundo. Nihilominus tamen si post quartum, quintum, vel ad summum sextum diem in robustioribus, symptomatum sævities in decursu morbi duram de novo sanguinem mittendi necessitatem imponat, tunc certè parca dosi, singulâ quâque vice sanguis est detrahendus & inter unamquamque evacuationem sufficiens distantia debet intercidere, ut oleosa totius corporis pinguedinis moleculæ inflammationis igne liquefactæ & in sanguinis alveo refluxæ, juncula, sorbitiones demulcentes, diluentes, &c. ad idoneum gradum vasa distendant, ne ab evacuationibus sanguinis sibi celerius succedentibus, cordis vasorumque vires concidant. Nec magis tuta esset illa lex quæ sanguinem iterum mittendum esse, etiam post pluries institutam venæ sectionem decerneret, quandiu superest durities in pulsu. Tunc enim attendendum magnopere ad numerum prægressarum evacuationum, considerandumque est attentissimâ manu an sanguinis columna quæ repellit explorantis digitum, sufficientis diametri sit, ut ruto imminui queat. Abroganda pariter nobis videtur præscriptio quæ, applicatis vesicatoriis, ab omni sanguinis evacuatione abstinendum esse suaderet, si præsertim antè vesicantium applicationem, venæ sectiones pluries celebratæ non fuissent. Superfedendum judicamus si angustissima exiguissimaque sanguinis

(a) See the  
cap. 117.

extracti rubra placentula in copiosissimo sero innatet. Superfeden dum tandem si in suppuratum res abierint. Nec ideo culpandi sunt externarum gentium Medici, quod multò citius à sanguinis missione abstineant. Victus enim tenuissimus quem ægrotantibus suadent, novi sanguinis generationi apprimè obstat. Qualiscumque verò sit numerus ad quem promovendæ sunt venæ sectiones, eæ semper in brachio lateris affecti sunt celebrandæ, ut superius probatum fuit. Antiquam & gravem objectionem fortasse quidam refricabunt, insurgentque adversus directam venæ sectionem quod plus ad inflammatam partem trahatur, quàm ab eadem detrahatur. At non qui ad partem appellit sed qui in eâ hærens congeritur, sanguis inflammationem efficit. Directâ autem illius missione, vacuatâ venâ subclaviâ, nonne sanguis ex venâ *azygos*, ex mammariâ, ex thoracis, ex intercostali superiore quasi attrahetur & exsugetur? Porro quædam in proximo paragrapho retulimus observata quibus certatim confirmatur nostra thesis. Qui plura desiderabit, HIPPOCRATEM (b), Galenum (c) Oribasium (d), Celsum (e) adeat. Ne verò extrâ Scholæ Parisiensis limites divagemur; Fernelium (f), Hollerium (g), Duretum (h), Riolanum patrem (i), Simonem Pietreum (k), Riolanum filium (l), consulamus & nullus amplius erit dubitandi locus. His rationum momentis, observationibus, autoritatibusque devincti in conclusionem rapimur.

*Ergò in Pleuritide sanguis mittendus è brachio lateris affecti.*

## DOMINI DOCTORES DISPUTATURI.

M. Joannes - Franciscus  
PARIS, Anatomæ &  
artis obstetriciæ in gra-  
tiam Matronarum  
Professor.

M. Dionysius-Claudius  
DOULCET.

M. Bartholomæus-  
Tusanus LE CIERC.

M. Ludovicus + Gabriel  
DUPRÉ, Serenissimi  
Principis Condæi  
Consiliarius Medi-  
cus.

M. Antonius PETIT,  
à Regiâ Scientiarum  
Academiâ.

M. Stephanus POUR-  
FOUR DU PETIT.

M. Petrus CHEVALIER.

M. Franciscus BERNARD.

M. Joannes LE THIEUL-  
LIER, Facultatis ex-  
Decanus, & Academiæ  
Censor.

Proponebat Parisiis JOSEPHUS PHILIP, Intervallæus-Glandatenfis,  
Doctor Medicus Remensis, nequon saluberrimæ Facultatis Medicinæ  
Parisiensis Baccalaureus. A. R. S. H. 1763.

A SEXTA AD MERIDIEM.

Typis Viduæ QUILLAU, Universitatis & Facult. Medic. Typographi, 1763.

(b) Lib. 4. de  
victu rat. in acut.  
part. 73.

(c) Comment.  
lib. 4. de vict.  
rat. in acut. part.  
73.

Item, lib. de cu-  
randi rat. per san-  
guinis missionem,  
cap. 14, 15, 16  
& 18.

(d) Lib. 1. Sy-  
nops. cap. 10.

(e) Medic. lib. 2.  
cap. 10.

(f) Lib. 1. me-  
thod. modend.  
cap. 3 & 7.

(g) Lib. 1. de  
morb. intern.  
cap. 16.

(h) Enarrat. in  
cap. 16. lib. 1.  
Hollerii de morb.  
internis.

(i) Method.  
particul. modend.  
sect. 2.

(k) Epist. ad  
Clariss. Guerinum  
Med. Paris. scripta  
anno 1714.

(l) Anchrup.  
lib. 3. cap. 8.